

do die koufflüte mit honyge vnde heringe alher yn die statt brengin, die denne eyn teyls zcu cleyne sint vnde nicht des rats vnde stat maß halden. Alßo habin die rethe eyntrechtlich beslosßen, das es mit den thonnen vnde ouch mit den halbin thonnen bei dem alden mase blibin solle vnde wo die meckeler thonnen mit heringe addir honige betreten, die do zcu cleine weren vnde des raths vnde der stat maß nicht enhetten, so sollin sie das straffen ynmasen vormals gewönlich gewest ist. Vff das abir die lüthe eyns sollichen mögen in wissen kommen vnde des eyne warnunge krigen, haben die rethe beslosßin, das man der halben an die stete Herczpergk, Kolo, Berlyn, Prenzlow, Sprenberg vnde Brandenburg schryben solle vnde die rethe der ehgantint stete zcu bitten, eyn sollichs forder an andere stete zcuschryben vnde zcuorkundigen, vff das sich ydermennlich vor schaden wysße zcu hutten vnde zcu-bewaren. Die rethe habin ouch beslosßen also von der meckeler wegin, das die meckeler nu hynforder von einer thonnen uffzuslahen von einem borger nicht mehri denne einen nuwen pfennigk vnde einen heringk nehmen sollin, abir von einem gaste mögin sie von einer thonne uffzuslaen nehmen III alde pfennige vnde eyn heryngk.

Nach dem Rathsbuch fol. 15 im Archiv des K. Bezirksgerichts zu Leipzig.

No. 410. 1467. 26. Febr.

Festsatzung der Befugnisse der Barbierer und Bader, welche mit Genehmigung des Rathes fortan zwei gesonderte Innungen bilden wollen.

Fer. 5^{ta} post Reminiscere LXVII^o sub doctore Nic. Pistoris. Nach deme alß sich die barbierer vnde bader mit wysßen willen vnde volwortt des raths mit iren ynnungen vnd hantwergen von enander gescheiden vnde gesundert habin, hat der rath mit wisßen willin vnde eyntrechtlicher beßlysunge der andern zcwier rethe, uff daß die gnantint hantwergk barbierer vnde bader eyns das andire an siner narunge nicht zcu nahent grife nach dor an vorhyndere, gesatzt vnde setezin das hirmit geynwertlich nu hynforder von den gnantint hantwergen alßo zcu halden yn maßen hyr nach folget.

Vnde deß erstin uff die barbierer orden vnde setezen sie: Wer der barbierer hantwergk innunge addir bruderschaftt gewynnen wil, das der selbige zcu voran burger syn solle vnde sall dem hantwerge zewey pfunt wachß zcu enthaldunge der kertezen vnde dor zcu eynen guldin an golde zcu enthaldunge anders gereths, daß denne das hantwerg hat, gebe vnde eher denne das geschiet sal nymants keyn buxße nach becken vßhengen nach wunden bynden adder losßin noch barbiren. Aber doch dennoch so mögin die badere becken vßhengen die tage so man badet, alßo denne bißher gehaldin ist. Ouch qweme eyn gut wundeartezt her, der magk ym iarmarkte ouch acht tage vor vnde nach adder ouch fordir nach irkentenisse deß rats buxßen vßhengen vnde wunden bynden, süst sal das nymandes thun denne die barbierer, die do vndir sich bruderschaftt vnde ynnungen haben. Es sall ouch keyn parth der gnantint hantwerk barbierer vnde bader ichtes nuwes keyn dem andern gedencken addir vornehmen hynder dem rathe addir des raths willin vnde wisßin, daß do vor-